



Inatsisartunut ilaasortaq Per Rosing-Petersen, Partii Naleraq
/Maani

§ 37 naapertorlugu apeqqummut nr. 61-imut akissut

Ulloq 6. marts 2015 Naalakkersuisutut imatut apeqquteqarputit:

Namminersorneq pillugu inatsimmi Kapitel 7 § 20-mi ima allassimasoqarpoq: *"Kalaallit oqaasii tassaapput Kalaallit Nunaanni pisortatigoortumik oqaatsit."*

Qaqugu Naalakkersuisut Namminersornerup inatsisaanni Kapitel 7 § 20 atuutilersinniarpaat?

Apeqquummut akissut

Aallaqqaasiullugu oqaatigineqassaaq § 20 ulloq 21. juni 2009 atuutilersoq.

Taamaammatt ilimagineqarpoq § 20-p qaqugu piviusunngortinnissaa apeqqummi pineqartoq.

Namminersorneq pillugu inatsimmi § 20 pillugu akisussaaffik naalakkersuisoqarfiup 2014-imi nalilersortippaa. Kalaallit Nunaanni Namminersorneq pillugu inatsisip piareersaalluni suliarineqarnerani takuneqarsinnaavoq Namminersorneq pillugu Ataatsimiititaliarsuup § 20-mut siunnersuutaani taamaallaat tunngaviummik pissutsit pineqartut, tassa pissutsit allat inatsisini allani killilersorneqarmata. Nalinginnaasumik aallaavik tassaavoq pisortatigoortumik oqaatsit pisortat allaffissornikkut ingerlatsineranni atorneqartartut oqaatsillu taakku inatsisini, eqqartuussinermi oqartussallu aalajangiineranni atorneqartassasut. Kalaallit Nunaanni Namminersorneq pillugu inatsisip suliarineqarneranut atatillugu kalaallisut, danskisut tuluttullu ilinniarnep pingaaruteqassusia aamma isiginiarneqarpoq. Oqaatigineqarpoq Kalaallit Nunaanni oqartussat politikkerigaat kalaallit oqaasiinik ilinniartitsineq qulakkeerneqassasoq pisortat ingerlatsineranni attaveqatigiinnermi atorneqarnerisa attatiinnarnissaa nukittorsarnissaalu, aamma kulturikkut tunngaviusutut oqaasiunissaat, anguniarlugu.

Namminersornerup ulloq 21. juni 2009 atuutilersinneqarnerata kingorna oqaatsit pillugit arlalinnik suliniuteqartoqarnikuuvoq. Assersuutit tamakkiisuunngitsut ataani takuneqarsinnaapput:

"Oqaatsinut politikki pillugu Inatsisartut inatsisaat nr. 7, 19. maj 2010-meersoq" Inatsisartunit 2010-mi akuerineqarpoq. Oqaatsinut politikki pillugu Inatsisartut inatsisissaattut siunnersuummut isumaliutit aallaavigaat, kalaallit oqaasiisa Kalaallit Nunaanni pisortatigoortumik oqaasiuneri, tak. Kalaallit Nunaanni Namminersorluni Oqartussat pillugit inatsit § 20.

Aammattaaq inatsisunik nalunaarutinillu arlalinnik oqaatsit pillugit aalajangersakkanik imaqartunik peqarpoq. Taakku tamarmik assersuutigalugu ilinniartitaaneq, atuisartut pillugit pisortallu ingerlatsinerat pillugit immikkut inatsisaapput. Inatsisissatut

20-03-2015
Sags nr. 2015-112413
Dok. nr. 1888593

Postboks 1029
3900 Nuuk
Tlf: +299 34 50 00
Fax +299 32 20 73
Email: iknn@nanoq.gl
www.nanoq.gl

siunnersuutit kingullit tusarniaassutigineqartut tassaapput tupanik nalunaaqutsiisarneq pillugu nalunaarutissatut siunnersuut aamma pilerisaarisarneq nalunaaqutsiisarnerlu pillugit Inatsisartut inatsisissaattut siunnersuut, taakkunani immikkoortuni taaneqartuni oqaatsit atorineqartarnerisa killilersugaanerit pillugu aalajangersagaqarpoq.

Nunat tamat akornanni inatsisilerinermit tunngaviit oqaatsit pillugit pisinnaatitaaffinnik aalajangersakkanillu imaqtartut arlallit Kalaallit Nunaata aamma akuerinikuuai.

Oqaatsit tusagassiutit atorineqartarnerannut tunngatillugu Radio tv-lu pillugit inatsimmi § 24-mi aalajangersagaqarpoq KNR-i oqaatsit pillugit politikkeqarnermigut kalaallit oqaasiisa tammatsaaliorneqarnissaannut ineriartortinneqarnissaannullu peqataassasoq.

Aammattaaq ilisimatitsissutigineqarsinnaavoq Innuttaasunik Kiffartuussinermit Angusassat pillugit KNR-imut isumaqatigiissutip suliarineqarneranut atatillugu Kultureqarnermut Naalakkersuisup kissaatigigaa innuttaasunut kalaallisut oqaasilinnut aallakaatitit procentinngorlugit radioqarfiup Innuttaasunik Kiffartuussineq pillugu nassuiaatini ilanngunneqartassasut, taamaalilluni aallakaatitit taakku ineriartortinneqarnerat ukiumiit ukiumut ajornanngitsumik malinnaavigineqarsinnaassalluni, taakkunanilu kalaallisut aallakaatitit amerlanerunerat takuneqarsinnaassalluni. Sumiiffinni radioqarfiit aallakaatitaminni oqaatsit agguagaanerit aamma nalunaarutigisarpaat, taakkunanilu kalaallisut aallakaatitit amerlanerunerat takuneqarsinnaavoq.

Malunnarpoq aviisit kalaallit oqaasii ukiuni kingullerni eqqortumik salliutikkaat.

2014-imut aningaasartuutissanut inatsisip suliarineqarneranut atatillugu pingaartumik digitalinnguinermit oqaasileriffiup suliaqarneranut atatillugu kontomi pingaarnermi 40.94.37-mi oqaasileriffimmut aningaasaliissutit 1,25 mio. kr.-nik qaffanneqarput.

Kalaallit oqaasiinik pikkorissarnissamik maannakkut neqeroorutit pillugit oqaluttuarineqarsinnaavoq oqaatsit aappaattut kalaallit oqaasiinik aallarlerlaanut qummullu Oqaasinik Pikkorissarfiup nammineq imaluunniit suliffeqarfiit, namminersortut pisortallu sulisoqarfii suleqatigalugit aaqqissugaanik Oqaasinik Pikkorissarfik neqerooruteqartartoq. Pikkorissarnerit aamma najuulluni pikkorissarnerit, taamatut pikkorissarnissamut tunngavissaqartuni najukkami pikkorissarnerit imaluunniit interneti atorlugu pikkorissarnerit neqeroorutigineqartarput. Tamassuma saniatigut kulturimik sunngiffimmilu ingerlatsinerit pillugit inatsit naapertorlugu kommunit kalaallit oqaasiinik inersimasunik ilinniartitsisarput.

Kalaallit oqaasiisa qaffarsarneqarnissaannut suliniutit aalajangersimasut uku oqaatigineqarsinnaapput:

IKT pillugu periusissiap (paasissutissiinermit attaveqatigiinnermullu teknologi) atuutilersinneqarneranut atatillugu nutserinermit programmi Namminersorlutik Oqartussat pisiaraat, taannalu Namminersorlutik Oqartussani Nutserisoqarfimmi nutserisut atortassavaat. Taaguusersuutit nalunaarsuivimmik suliaqarnerit ingerlanneqarpoq, tassani Oqaasileriffik suleqatigineqarluni. Nutserinermit atortut digitaliusut atuutilersinneqarnerat pisortat nutserisoqarnermi aningaasartuutaasa pitsanngorsarnissaanut tapersiissaaq aammalu nutserinermit atortup atuutilersinneqarnerani siunertaalluni Namminersorlutik Oqartussat Nutserisoqarfianni naammassineqarsinnaasunik aqutsinerup pitsanngorsarnissaa kiisalu pitsaassutsimut,

amerlassutsinut, sullissinermut ukiullu ingerlanerani ingerlatanut assigiinngiaartartunut tunngatillugu Namminersorlutik Oqartussat nutserisartunik atuinerisa siunissamut qulakkeerinniffigineqarnissaa.

Synscenter Refsnæsip kalaallisut qarasaasiakkut atuffassissut "Martha" Nuummi ulloq 17. februar 2015 aqqissuussinermi saqqummiuppaa. Suliniut Velux Fondene-nit tapiiffigineqarluni piffissami 2013-2015 ingerlanneqarpoq aammalu Odensemi Mikroværksstedet-mit Synscenterimut pilersuisutut ineriartortinneqarluni.

Tamassuma saniatigut periusissatut iliuusissatullu pilersaarusiaq "Paaseqatigiissa" – pillugu nassuiaat suliarineqarpoq - Innuttaasut tamarmik kalaallit oqaasiinik atuisinnaanissaat qulakkeerniarlugu suliniutissat suliniut. Nassuiaat aprili 2014-imeersuuvoq.

"Paaseqatigiissa"-p imaraa isumassarsiat allattorsimaffiat suliniutissanik, sullinniakkanut assigiinngitsunut sammititaasunik imaqartoq, allatulluunniit oqaatigalugu, innuttaasut ilaat kalaallit oqaasiinik atuisinnaanngitsut kalaallisut oqalussinnaalersinniarlugit pingaarnertigut assigiinngitsunilluunniit suliaqarneq aporfiginagu suliniuteqarnissamik siunertaqartoq.

Innuttaasut amerlanerusut kalaallit oqaasiinik atuisinnaalernissaat Naalakkersuisut kissaatigaat. Naalakkersuisut aamma ilisimalluarpaat kissaatigisaq taanna eqquutsinneqassappat – inuit ataasiakkaat piumassuseqavillutik iliuuseqarnernisa saniatigut – amerlasoorpassuartigut suliniuteqarnissaq pisariaqarpoq. Tamanna pitsaanerpaamik pisinnaavoq ilinniartitaanerup tamarmiusup tungaatigut suliassanik qulaajaalluarnikkut pingaarnersiuinikkullu, tassa suliniutissat assigiinngitsut aningaasatigut periusissatigullu kingunerisassaasa paasiniaqqissaarnerisigut.

Tamassumunnga tunngatillugu iliuusissatut pilersaarutit Naalakkersuisut misissorusuppaat, tulleriinnilersuinerillu aallaavigalugit suliniutit pitsaanerpaamik sunniuteqartut Naalakkersuisunit isigineqartut piviusunngortissallugit.

Tunngavilersuutinni allapputit Namminersorlutik Oqartussat atuutilersitsinerani oqaatsit tungaatigut ineriartortoqarsimanngitsutut isikkoqartoq oqarlutillu kinguariaateqartoqarsimasoq.

Paasissallugu pingaartuuvoq oqaatsinik ilinniarnissaq sivirusartooq anguniagaqarluni suliniuteqarnissaq pisariaqartoq. Pingaartumik ilitsoqqussaralugu oqaatsit oqaatsit allaanerujussuugaangata. Kalaallit oqaasiinik allamiullu oqaasiinik ilinniarnermut tunngatillugu ikioqatigiittarnissaq inuit ataasiakkaat piumassuseqarnerannut pingaaruteqarpoq.

Suliniutit sunniuteqarnerpaasussat Naalakkersuisut salliunniarpaat, taamaalilluni aningaasartuutitigut akisussaassuseqartumik kalaallit, danskit tuluillu oqaasiinik ilinniarnissamik pisariaqartitsisut kiisalu kalaallit oqaluttuarisaanerannik, kulturiannik inuiaqatigiinnilu pissutsinik ilinniartinneqarnissamik pisariaqartitsisunut sunniuteqarluarnerpaamik suliniuteqatigineqarniassammata.

Naalakkersuisut naliliipput naak suli unammilligassaqaraluaqisoq § 20-p imarisaa annertuumik piviusunngortinneqarnikuusoq.

Inussiarnersumik inuulluaqqusilunga



Nivi Olsen